



Malaysia Open: HS Prannoy quarterfinals-i iogo

CM Conrad-i Shillong nung 'shared school bus system' tenzüksü

DC temi külem candidate meshimtsü tuyor

Dimapur, January 12, 2023 (TYO): Nagaland nung assembly elections agitsü mapang tonga arudang District 6 nungi Deputy Commissioner temi yimtsüing/tesem/tzükong külem candidate meshimtsü atema tenokdangba agütsüogo.

Iba inyakyim ya Indian Penal Code ajanga memelar ta parnokisa. Zunheboto, Dimapur, Peren, Wokha, Mokochung aser Niuland nung DC temi sangdong balala nung elections nung tim masüba inyakyim aser vote enoktsütsü temeten anema inyaksangshiba nungi kümdanga alitsü nenshia metetdaksü.

Itemji IPC nung Arlla 171C, 339 o 340 aser ano Representation of the People Act 1951 nung Arlla 125 anema lir aser item mapa inyakterem ozüing kübok merenshitsu ta Deputy

Commissioner temi ashi.

Election Commission-i April 16, 2014 nü tetuyuba agütsüba nung election mapang lokti tentetemi nisung ka anema meinyaksü mesüra o mejembitsü shia lir. Iba ya ozüing memelaba mapa ka lir, ta parnokisa nenshi.

Nagaland Village Council Act 1978 nung Arlla 15 kübok Village council tem ya administration indang kongsang ka ama züngsema lir anungji elections dak sendakba nung Village Council temi tiyongtsü nung dang mapa inyaksü, ta DC temi metetdaksü.

Maneni, public/tzükong tentet/village council temi item ozüing meteta alitsüba aser yimtsüing/tesem/tzükong külem candidate meshimtsü, ta parnokisa ashi.

Longpok Semchir Telongjem Inti Mungdang alir

Ungma, January 12, 2023 (TYO): Ungma yimtak January 12 anong nungi tenzuka 7 Buba Longpok Semchir Telongjem Inti Mungdang "Lipok Tamendakdak Arangshi" ta asüba omen nung ajemdaker tenzükogo aser iba mungdang asüing onung tembangtsü.

Taonung sentong nung taoba HOD & Asstt. Professor of Sociology Alder College Kohima Dr. M. Temjen Lkr (Mupongchuket)-i "Tanü iba putu nung kidong teinyaksü" onük jembi.

"Tanü putu ya Internet Putu, Technology Putu, Sobaliba Melenshia Aoba Putu, Sobaliba Sama-a Aoba Putu aser Khrista Dak Amangba Putu lir, item ajanga asenok kechisarena ajak nung atsür aoba putu ka lir, anungji iba ama tatsütep putu ka nung alidang asen kidong

teinyaksü jenti lir" ta pai ashi.

"Tanü kanga dang kara-a melenshia ainba putu nung asen sobaliba wazüka ayutsü kanga dang nüngdaker. Sobaliba metsünga reta wazüka ayutsü asoshi asen Longpok semchir subsolemstü, Longpok semchir jazükba teratet chirnurtem dang jangja jangja-a ashitsü. Itemji asen chirnurtem dang jangja jangja-a metetdaksüra tarutsü nung parnokisa kibalembuba, libaliro aser sobusolemstü nung aibelen masütsü" ta Dr. M. Temjen-isa ayongzük.

Sobaliba nung kanga dang tongtipang kaji tetsü oshi ya lir, tetsü oshi memetetbaji maaksü aser tetsü oshi memetetba jagi kin ka rajang kümdaksür, anungji kibong shia nung Ao oshi jembitsü ta paisa shisem. (Maneni tapak 2 nungi...)

Nagaland nung State Level MCMC tentetogo

Dimapur, January 12, 2023 (TYO): Nagaland Legislative Assembly 2023 indang General Election agitsü aliba atema State Level Media Certification and Monitoring Committee (MCMC) tentetogo.

Iba ya Election Commission of India (ECI)-i January 5, 2023 nü sangdong agütsüba nung ajemdaker tenteter.

State Level Appellate MCMC ajanga District aser Certification Committee nungi advertisement indang telemetba agitsü.

State Level Appellate MCMC-isa District MCMC lemtet anema Paid News mesüra parnok sasa ajiteta mapa inyaksü aser ROs dang candidate nem sangdong agütsütsü atema tetuyuba agütsütsü.

State Level MCMC züngsemtem:

1. **Chairman** : V. Shashank Shekhar, IAS, Chief Electoral Officer, Nagaland.
2. **Member** : One Observer appointed by the ECI stationed in Kohima.
3. **Member** : Dzüvinuo Theünuo, Additional Director & HoD, Directorate of Information & Public Relations.
4. **Member** : K. Sonikumar Singh, Assistant Director, PIB Kohima.
5. **Member** : Alice Yhoshu, Journalist & President of Kohima Press Club.
6. **Member Secretary** : Alila Chang, Deputy Chief Electoral Officer & Media Nodal Officer, CEO's Office.
7. **Member** : Tongtiliba Longkumer, Director, Directorate of Information Technology & Communication.

NPAC-i Jan 14 nü ECI anema lungkak aittsü ayonger

Dimapur, January 12, 2023 (TYO): Election Commission of India (ECI)-i Nagaland semdangba anema Nagaland People's Action Committee (NPAC)-i January 14, 2023 nü lungkak aittsü lemtetogo.

NPAC-i January 14 anepdang 6:00 ako nungi anungdang 12:00 ako tashi lungkak aittsü.

Teti atema Indo Naga yimten latetsü asoshi inyaksü atema NPAC ya June 2022 nü tentet.

"Nagaland semdangi aruba ECI telok dang asenok election masü saka yimten latetsü atema noktaker ta sayutsü atema ozüing melaba lungkak aiba sentong ka agitsü" ta NPAC Convenor, Theja Therieh-i ashi.

"Nagaland nung telok kati danga yimten latetsüba anema menokdaker aser Naga nungeri election masü saka yimten latetdaksünür. Iba osang ya tekolak nung mena alirtemia angashitsüba aser political party

kechaia tensa nung ajemdaker tajangzük mebushitsüba kechiyong iba ya ozü tarutsü atema lir" ta Theja Therieh-isa ashi.

"ECI teloki assembly general elections agitsü aliba atema arutsüba lir saka Naga nungerbo yimten latetsü atema yongyaseta atar. Parnoki semdangba atema onoki kecha mashir kechiyong parnokisa temzüngi melaba ama inyaker" ta paisa ashi.

"Naga kin hohotem aser civil societies-i NPAC pusemer aser iba telok ya tekaratiba nung Naga yimten latetsü atema tentetba lir. Anungji onoki iba mapa inyaksü aser India sorkaria parnokisa nangzükba ama inyaksü amanger" ta NPAC Convenor-i metetdaksü.

"Küm 26 tashi olemtepa aruba ya teperi. Olemtep ajanga telemtetba kecha magitetra olemtep anentsüba aser nübertem nem timtem magütsütsüba. Olemtep tenüing amer nisungtem

timtemdaksüba anentsüba" ta paisa ashi.

"India sorkari Naga nunger nem election nung vote südaksünüra, parnokisa tensa tajung kümdaksütsüba aser yimjung agütsütsü tim. India sorkari yamaji inyak nung dang asenokia democratic maparen shitak tenzüksü aser sorkar ketdangsubaren shitak inyaksü" ta NPAC-isa metetdaksü.

"NPAC-i yimten latetsü atema inyaker aser India sorkaria Naga yimten lateter yimjung bener arunür. India sorkari koba agütsütetsü aser koba magütsütetsü shiogo anungji tang Naga nungeri pei tebilemba metetdaksütsüba" ta parnokisa ashi.

NPAC-isa nübor ajak dang January 14 nü Airport lenjem nungi National Highway nung banner ase rplacards amer lungkak aiba nung shilem agitsü mepishia metetdaksüogo.

Congress-i Nagaland nung taruba sorkar akümtsü: Mohan Prakash AICC lennirtemi NPF President Dr Liezietsu & WP Tunyi den ajurutep

Kohima, January 12, 2023 (TYO): Tesüiba mapang Indian National Congress (INC)-i Nagaland nung wangshiba ama ano wangshitsü atema taruba sorkar akümtsü tebilemba lir. Iba atema national lennirtemi Nagaland semdangia arua lir ta NPCC ketdangsurtemi ashi.

Screening Committee for Nagaland Election Chairman aser taoba MP Mohan Prakash, AICC secretary & member screening committee Sanjay Dutt aser AICC Secretary i/c Nagaland & Sikkim Ranajit Mukherjee nunger adenba All India Congress Committee (AICC) teshimtet telok kati Brihostibarnü Nagaland Pradesh Congress Committee (NPCC) aser parnok kübok kongsang ajak den senden amen.

Congress-i taruba Nagaland assembly elections atema secular front ka tentetsü meranger ta osang angazüker.

Prakash, Dutt aser Mukherjee nungeri tanü Kohima nung Naga People's Front (NPF) president Dr Shürhodelie Liezietsu aser NPF Working President Thenucho Tunyi na dena ajurutepogo.

"Onoki party lennirtem, züngsemtem aser election nung shilem aginüba bilemba candidate tem den ajuruteptsü atema aru" ta Screening Committee chairman Sanjay Prakash-i osangbener dang ashi.

"Nagaland nung election agitsü osang mali saka Congress Party indang Central High Command-i Nagaland nung taruba sorkar akümtsü nükjidong

lir. Tang Nagaland Assembly nung Congress MLA ka danga meliaka onoki iba sorkar atsüngdoktsü atema inyaksü" ta pai ashi.

"Nagaland nung tang aliba sorkar atsüngdoktsü atema onoki kasa tangatetba aliba political party tem aser yimsüsürtem den ajurutepa sensaksemer, kechiyong tang aliba sorkari ochimashi aser tim mesüi ketdangsur. Iba ajanga nübertem timtemer" ta Sanjay Prakash-i metetdaksü.

"BJP-i aniba Centre sorkari Kashmir nungi Arlla 370 agienogo aser parnokisa Nagaland nungi Arlla 371(A) agiennür aser ano Naga nunger tali lemsadaksünür" ta pai ashi.

Centre sorkari Naga yimten onük atema nisungtem ashiochtsür kechiyong parnokisa yimten melatetnür, ta paisa shisem.

"Nagaland Chief Minister Neiphiu Rio ya Centre sorkar aser BJP-i anishinütsü anishiba nisung ka lir aser parnokisa state sorkar dak tashiyim inyaker aser iba ajanga state nung alir ajak timtemer" ta Prakash-isa ashi.

"Nagaland nung infrastructure, education aser roads dena maparen ajak nung tamakok lir. Anungji asenok ajak longjemtsü maongkaji election lir aser iba ajanga linük dang Nagaland ajangzüksü atema ola yoktsü" ta paisa ashi.

"Congress aser kasa tangatetba aliba party temi Nagaland nung tang aliba atsüngdoktsü" ta Prakash-isa metetdaksü.

"Onoki party lennirtem aser züngsemtem den ajurutepa sensaksemer Naga nunger tebilemstü aser khurettem angazükogo. Onoki Nagaland nung alirtem atema kanga süoki ia bilemstür" ta AICC secretary Dutt-ia ashi.

"BJP sorkari linük ka tamangba yimsü ka yimyim agütsür inyakba atema aitsür. Nagaland ya temeyoktep süaka longjema aliba state ka lir. Ajisüaka tia maka BJP-i Citizenship Amendment Act (CAA) bener aruba ajanga parnokisa miim tebilemba yimjak nung sayuogo. Parnoki India ya kin, tamangba yimsü aser tanga inyakyim ajanga lemsanür" ta pai ashi.

"Ajisüaka Congress-i item maparen ajak anema noktaksü" ta Dutt-isa shisem.

"AICC lennirtemi Nagaland semdangba ajanga state Congress züngsemtem tasü itshitsü. Nagaland nung taruba sorkar akümtsü atema secular tangatetba aliba party ka nüngdaker. Nagaland ya Khristan state ka lir aser Congress-i dang Naga nunger tamangba yimsü kümzüka yutetsü" ta NPCC working president Khriedi Theünuo-ia ashi.

"BJP-i tamangba yimsü ka atema dang noktaker aser parnok Nagaland nung talidak maka. Congress ya secular party ka lir aser onoki nübo agi tangar menenepor ajak kümzüka ayutsü" ta paisa ashi.

Brihostibarnü AICC lennirtemisa Mahila aser Youth Congress lennirtem den ajurutep.

Chumukedima nung District Level Social Audit Public Hearing agi



Chumoukedima District Level Social Audit Public Hearing mapang tangokba noksa nung angur.

Dimapur, Aenjeti/January 12 (TYO): MGNREGS & DRDA Dimapur kübok District Level Social Audit Public Hearing January 12 nü DC Conference Hall, Chumukedima nung agiogo.

Project Officer, DRDA Dimapur, Narola Imkong lenisüba nung iba sentong agi aser lai, inyakyim nung ochi mashi ken o kecha melidaktsüsü atema yimtsüngtem nung Social Audit ayongzüka agiba atema Social Audit Team dang kanga pelaba lemsatep aser yimtsüngtem dang yimtsüng terenlok asoshi team-i lenmang balala sayuba sülen anidaktsü mepeshia liasü.

State Resource Person SAU, Nagaland, Vepo Keyho-i, Chumukedima Block kübok yimtsüng tener, Kuhuboto Block kübok yimtsüng 17 aser Aghunaqa Block kübok yimtsüng 6 nung taoba Social Audit nung audit agiogo, ta ashi. Paisa, Social Audit Unit ya Rural Development

Department kübok MGNREGA scheme den külemi department ajak indang Centrally Sponsored Schemes tem ajak ochi shia benoka inyaksangshitsü atema 2014 küm amenok ta ashi.

Keyho-i ashiba agi, yimtsüngtem nung audit agibatem lepareprangshitsü atema Social Audit ya mapashia agir aser iba sülen sorkar indang website nung upload sütsür.

Kasa mapang nung yimtsüngtem nung ngutetbatem, iba dak sendakba ken o, jenjang agiba osang aser bangzüngtem senden nung densema aliba VRPs/BRPs/DRPs temi agütsü.

Board-isa, Gram Sabha Resolutions nenshitsü aser Ministry tetuyuba dak ajemdaker inyaker aliba project tem ajak atema detail Transparency Board anepalutsü bangjema liasü. Senden nung, Rozgar Diwas mapang shia ayongzüka agitsü, tenüngdakba detail tem ajak keter Job Card tem uptade asütsü, inyaker aliba project tem ajak indang three

phases photographs ayutsü, MIS aser Block Office sanction na tsüngda sen meputepba agizük aser iba aibelen bentettsü atema jenjang tapet agitsü bangjem, Kuhuboto Block (Pishikhu, Kushoto, Luzheto, Kuhoto, Nishevi, Lukuto) aser Chumukedima Block (7 Mile, Khriezephe, Sodzulhou, Diphupar, Kirha, Seloupe and Toluvi) atema sen 160,515 resource person-i mendenbuba nem agütsü, tanga yimtsüngtem atema senotsü ketdangsur nem deposit sütsüsü asoshi 2023 küm January tatem tashi mapang agütsüogo, MIS aser Social Audit nung senotsü meputepba Public Hearing mapang Pishikhu, Padala, Phuhoto aser Lukuto yimtsüng atema Kuhuboto Block ketdangsur nem agütsüogo.

Nizheto yimtsüng kübok project work Approach Road (2308006001/RC/25684) atema Proper Transparency Board ka asoshi concrete Board ka amenoktsü anogo 14 latettsüogo.

NSCN/GPRN-i 'Poang Lum' benjung salem lemsatep

Dimapur, Aenjeti/January 12 (TYO): NSCN/GPRN-i sangdong ka ajanga Chang nungertem den 'Poang Lum' benjung salem lemsatepogo.

Iba benjung ya alu aroba sülen January ita tanabuba hopta nung amunger, koba tangar dak memetaloki pei poksüng azükteta aliba benjungba mapang ka lir.

Asenok putu tasen kati ayaoka aiba mapa iba benjung amungba ajanga Chang nungertem nem yimjiyijung bener arujang ajita asünungdang parnoki lenla ajak nung tejakdang ser len anitettsü, ta NSCN/GPRN (Akato Chophi) MIP sangdong ka ajanga metetdaksü.

HSLC kaketshirtem nem angati Coaching agütsüsü

Dimapur, Aenjeti/January 12 (TYO): Dimapur Naga Students' Union-i taruba HSLC tatidang (2022-2023) atema kaketshirtem nem January 11 nü nungi ita ka atema Dimapur kübok tesem balala nung angati coaching agütsü tenzüko.

Tanü tashi nung angati coaching class tem nung shilem agitsü atema kaketshir 300 züngoksema lir. Iba inyakyim ya talisa coaching class nungdaker saka kuli balala ajanga magiteti ali, parnok atema lir.

Angati coaching class tem ya Science, Mathematics aser

English subject tem dak rangloker agütsüsü.

Union-i kaketshirtem academic result aser tatidang nung shilem agiba kanga süoki ia agir. Anungji taruba tatidang nung result tajung angutsü timla nung Union-i iba sentong tenzüko.

Kasa mapang nung Union-isa, züngoksema aliba kaketshirtem shirnok angati coaching agidar, parnok dang class tem nung kanga temulung agüja adentsü mepeshia metetdaksüogo, ta Education Secretary, Tesiding Newmai-i sangdong ka ajanga metetdaksü.

Mkg nung HBYC dak sendakba nung training sentong agi

Dimapur, Aenjeti/January 12 (TYO): Home Based Care For Young Child (HBYC) dak sendakba nung Urban ANM aser ASHA tem atema anogo asem training sentong ka Chief Medical Officers Office, Mokokchung nung January 9 nungi 11 tashi agiogo.

Training nung shilem agirtem nem HBYC shilem, HBYC atema ki semdangtsü asoshi sentong yangluba, Addressing social vulnerability to improve coverage of children, Early childhood development, Growth Chart monitoring, Iron Folic acid supplementation, Full Immunization aser MCP card

nung Immunization details dak sendakba nung tangazükba agüja liasü.

Iba training sentong nung District Community Mobilizer, Consultant NUHM, Block ASHA Co-ordinators aser Community Health Officers temi shilem agia liasü.

Directorate of Health Family Welfare, Nagaland nungi Benjungtoshi Jamir PMCH-i iba training sentong ya achaayanga liasü.

Maneni iba training sentong ya Mangkolemba, Alongkima aser Tsurangkong block tem nung January 17 nungi 25 tashi agitsü.

Mokokchung nung NCC Blood donation camp kaogo



Dimapur, Aenjeti/January 12 (TYO): 25 Naga Bn NCC, Mokokchung tawabangba kübok tang agia aliba Combined Annual training Camp (CATC) mapang NCC Cadets temi Blood Donation Drive ka nung shilem agiogo.

Camp mapang tetsür aser tebur cadet temi azü tenla agüja liasü. Dr H Tsipongchem Sangtam-i anir Blood Centre, District Hospital, Mokokchung nungi medical team kati cadet tem indang blood group tendang aser parnok indang blood group cards agüja liasü.

Kasa mapang nung azü tenla agütsürtem dak tanga tashidak keta ali mali jangjatsü atema tetendangba agi aser tatem nung District Hospital, District Hospital Mokokchung nung teti nungdakba blood group aser

blood centre nung storage capacity dak ajemdaker azü agizüka liasü. Ajak senteper tenla agütsürtem dak nungi azü unit 21 agizüka liasü.

Iba sentong nung o jembiba mapang Camp Commandant Col CST Swamy-i, lokti terenlok asoshi NCC bendanga agütsür aliba lemsatepba den azü tenla agütsüba ya temsüa aliba NCC Cadets tem yongtsü nung nungtugu kümdaktsüsü nangzüka liasü.

Paisa, Blood Centre, Mokokchung aser Mokokchung Voluntary Blood Donors Association den tongtepratepba sülen 25 Naga Bn-i 'NCC Blood Donors Platoon' ka amenoktsü, koba district 11 prongla nung NCC Cadet temi azü tenla agütsüba repository aser facilitator asütsü ta ashi.

Camp ya sobaliba sentong ka agiba sülen tembang, kong cadet temi sobaliba tsüngsang, ken saya liasü. Sentong nungsa Naga nunger rongnungi nungtugu kentener Lenen Jamir-ia shilem agi aser cadet temi mepishiba ama lai nungtugu Ao ken "Itaya Nungu" tena liasü.

Maneni Fazl Ali College Grounds nung sempet agütsüba sentong ka ayongzüka agi aser iba sülen Camp Fire ka agia liasü. Fazl Ali College nungi SUO Sentiyangla Imsong aser Sgt Chubamayang na nem tetsür aser teburtem rongnungi 'Overall Best Cadet' trophy agüja liasü. Iba den Drill, Shooting, saisapong aser sobaliba tetoktepba balala nung takoker angur aser runners up nema sempet agüja liasü.

Longpok Semchir Telongjem... (TAPAK 1 NUNGI...)

Tsürabur mapang nung tebang o agi dang asen otsütemji mulunga zünga rizünga ayu, saka tanü putu nung asen otsüolem ya taroktiba nung bushisüngdanga züludena ayutsü kanga dang tongtipang lir. Iba ama züluba nung aibelenra senchimenchi mechii metongshitepa angatetteper zülushiteptsü kanga dang nungtaker ta tongti o jembir-isa tebilemba ka ashi.

"Ao kinji Tsüngrem tsüba aruba kin ka liasü, süng lung külemba mapang nung parnoki ochishia merenmerena külemba ajanga par tsüngrem nungi temoatsü angu. Yamaji tanü Yisu Khrista dak amangba putu nunga asenoki Tsüngrem dak azüiti aser ibaji ajanga asen Ao kin dangi Tsüngremer temoatsü arudaktsüdi aser ibaji Longpok semchir teinyaktsü südi" Dr. M. Temjen-i tesentepertem ayongzü.

Iba sentong nung Tsüngrem nungi lenisüba meshia Ungma Baptist Arogo Lozütangkong Fellowship Asso. Pastor

Takowati-i sarasadem, Longpok Semchir Telongjem Tir Wb. K. Nokmarenba, Wb. Tesüzenba Longkumer Tatar Ungma, Wb. Limayanger Tatar Ungma Village Council aser Aoli Pongen Mungdang Tir Guru Bendangwati nungeria o jembir aser Merangkong Longpok Semchir Telongjem ajanga sobaliba ken ka tena lokti ajungmesoa liasü.

Iba mungdang nung yimtsüng 33 aser jila telen 3 nungi nisung 400 shi adenshia lir. Asüng tanabuba sentong nung Nagaland Legislative Assembly Speaker Wb. Sharingain-i tayongzüka o aser taoba Parliamentary Secy. Nagaland Wb. S. Chuba Longkumer-i tepela o jembitsü. Manenim tebu teti Aochuba Longsa-i "Lipok Tamendakdak Arangshi" omen nung ajemdaker tongti o jembitsü.

Tasembuba sentong nungji osangtem agiteptsü aser Mendenpur melentepba mapang agitsü.



TIR YIMYIM YIMOBILEM (EDITORIAL)

DIMAPUR ROGONÜ, AENJETI(JANUARY) 13, 2022

Memokdangi nübortem ajurutsüla

Tang ya shitakba Naga nungertemi India temzüng kübok agia aruba election ya maginer saka Election Commission-i mapang shitak nung agitsüsa sentong adokra, joko polling day atongtsü anogo 60 jung mejungka dang anünga lir, anungji election agitsüba anogo mesangdongdangsa Naga nungertemi longjemer telemtetba ka agitsüla. Atangji, Nagaland nung alir Naga nungertem asoshi yimkong adenshir telemtetba ka agitsü tasak, kechiyong asenok ajak külemi adenshidak sabang ka ta maka kümogo, iba jagi Naga yimten tebilemtsü ken o nunga kenbang obang ka medemer India den par bang koka mejembitetter. Iba ama mapang ka nung, külen Eastern Nagaland purtemi tang aliba Nagaland state kübok liabo election maginer aser Nagaland nung tenteta aliba lokti tentetemia Naga yimten tebilemtsü ya melatetibo election magitsüla ta ajangajanga metetdakja lir. Atangji, Nagaland nung Naga yimten lateter külen ashi, election magitsüla ta nokdakba ya tang mezüng masü. India nüchiso ngur külen mezüng India nung 1952 küm election agiba sentong nung Naga National Council lenirtemi anir Naga nung shingaia India temzüng kübok mezüng election agiba nung shilem magi. Ibaji Naga nungertemi India temzüng kübok melinüba tamaisü mapa agi sayuba ka liasü. 1952 küm India nung mezüng election agiba sentong nung Naga nungertemi shilem magibaji, NNC lenirtemi Naga nung tsübudakja tashiyim agi nokdangba agi masü saka Naga nungertemi peisasa pei linük nüchiso asoshi nokdaksü mulungtetba mapa ka liasü. Iba mapang, 1952 küm November 18 nü NNC tadong tir Wb.Imkongmereni NNC tenüng nung India ato kilonser Jawaharlal Nehru nem Naga nung yimten nüchiso jenjang nung alitsü temeten aser tejangraba indang onük tezüluba nung agütsüba otsü lir. Ajisüaka, India government-i Naga nung nem yimten nüchiso agütsütsü melen sepaitem dang yoka Naga nung reshikangshi tenzükba otsü asenoki azünger. Nagaland state ya iba ama reshikangshi timtemji maremeshiba state ka lir. Ajisüaka, Nagaland state akümba agia Naga yimten tebilemtsü ken o bo metembangtet nungji, aiben India nung pu küma Naga nungertemi Naga nung reshikangshiba mapanga liasü. Item timtem reshikangshi mapangtem ajakji ajanga arur külen, ano 1998 küm-a nübortemi Nagaland nung election magii Naga yimten tebilemtsü ya tama kokdi ta takangba agüja nokdak, saka menokdangtet election agidaksü, anungji tanü tashi Nagaland nung yimten telemtetba kati maruteti election shia nübortemi election masü solution aginer ta ayimtenba ola asenoki angashir. Aji oda, tanüa kasa ayimtenba ola Naga nung telok balala nungi adokba angashidagi. Item teloktem rongnung Nagaland People's Action Committee (NPAC) purtemibo asüng Nagaland ajak anepdang tsütsü ghonda trok mokdangtsü osang agütsüba ya asütsü. iba sentong ajanga nisung shinga kechalenia moudaksü aser kecha meinyakdaksü mokdang asünungji takoksa aser timtem kanga ajurutsü. Ajisüaka, Naga yimten telatetba kati arudaksütsü asoshi election nokdangtsü atema kechiang matong, Delhi nungi Election Commisison pur aruba mapang mokdangtsü sentong ya dang apitet südi. Atangji, timtem takoksa terakata magiibo asenoki bilemba metongtettsü, anungji asenok nungdak ataloktsü asoshi asenokia tenla langkabosa agütsütsü tim. Ajisüaka tang amaibo, külen Naga yimten ken o tatembang küma latetdaksüner aser külen election magii nokdangtsüla ta asüba mapang yabo, nübortem kechalenia moudaksüi nokdangtsü melen NPAC lenirtem nübo lemsar Nagaland tesem ajakleni oa nübortem ajurua Naga nung asoshi yimten rongdak nungdak ken o lemsatapa jaja nung tajungba asütsü. NNC mapang Naga nungertemi India nung election nung mulungsua shilem magibajia, NNC lenirtemi tesem ajakleni tetsüng agi tsüngdonga oa nübortem ajurua tangattetba agütsüba agi liasü. Parnok jiluji ajizüka tanü asenok lenirtemi timtem agia inyaklasang, Nagaland nung alirtemi mulungsua election nung shilem magila.

OLEMSABANG

"AROK KÜLEM"

~ L. Kika Pongener

Arok külemi langpang ka nung chiyungra, koda tanang
Arok külemi lenmang nung jajara, koda jangyu-medem
Arok külemi yipten ka nung mejangra, koda lem-lem lir
Arok külemi longjemer tenzükra, koda temenungratsü-ka.
Arok külemi teka amteper inyakra, koda jangratemtsü-ka.

Arok külem wadang nung longjemer inyakra, koda tajung
Arok külem apangteper tsüngsang nung koda topur tajung
Arok külem sungpo aputepa lira, koda tapayutsü-ka asütsü
Arok külem kati ka den meimtepa litetra, koda tenukshitsü
Arok külemi kati ka tushitepa lira, koda temenungratsü-ka.

Arok külem longjemer yimsu asüba nung, koda tashi tulu
Arok külemi bangjemer yimden tenzükra, koda aküm taket
Arok külem kenbang obang ka ser tenzükra, koda temoatsü
Arok külem temulong ka ser nokdakra, idakji tamakok mali
Arok külem shisa mulong ka ser inyakra, koda jangratemtsü.

Arok külem shisadanga inyakba nung kecha tamakoktsü mali
Arok külemi longjemer tenzükra tamakoktsü ajunga takoktsü
Arok külem teka amteper inyakba mapatem nung teti takok lir
Arok külem shisa obang ka ser jembira kecha tamakoktsü mali
Arok külemi teka amteper tsüngsangra koda temenungratsü-ka.

Arok külemi kati ka den yaritepa tenzükra koda temoatsü tulu
Arok külemi kati ka nem shisatsü agutsütepa lira koda tajung
Arok külem kati ka sungpo aputepa lira koda jangrademtsüka
Arok külemi kati ka den meimtepa litetra koda-ka tapayutsüka
Arok külemi kati ka tenungsangtepa litetra koda tenukshitsüka.

Arok külem longjemer nokdakba nung tamakoktsü ajak akoktsü
Arok külem ajungtsü nung rangloker inyakra shinga takoksa mali
Arok külem shisatsü agi lemteter inyakra kecha tamakoktsü mali
Arok külemi ajangzüktsüba nung rangloker inyakra takoksa mali
Arok külem kati ka tashi-shitepa litetra kodanga telemsa malitsü.

Arok külem longjemer apusora alizüngji yakta dang tongtettsü
Arok külem longjemer inyakba nung koda temoatsü tulu asütsü
Arok külem longjemer lenisuba nung koda terenlok tulu asütsü
Arok külem longjemer nokdakra mapa ajak nung takok angutsü
Arok külem longjemer shisadangra ken o tasak ajunga takoktsü.

Ka dang nungi ana tajungba, kechiaser parnok alangra, kati pa medemerji mesotsü; Saka kija alisang aiatai, kechiaser kodang Pa alangdir, pa mesor shinga maliAno ana külemi mejangra parnok lem - lema lir; saka ka kisung koda alemtsü? Aser kati kija alir ka kok - aka, nisung ana anema pai majettsü. Lisu asem mesentepba-bo mela - mela metokdangteteter. (Sayu - 4:9-12).

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Osangtajung kentener Daigle-i charities nem sen 600,000 tenla agütsü



Lauren Daigle indang foundation- The Price Fund-i telok ka nem tenla agütsü dang tangokba noksa nung angur. Lauren Daigle-a (tesülen abelen nungi pezübuba) noksa nung angur.

January 12, 2023 : Osangtajung kentener, Lauren Daigle-i la indang foundation The Price Fund ajanga charities balala nem sen dollar 600,000 dak tema tenla agütsüogo.

La indang The Price Fund ya tanurtem, tantsür-tamburtem aser nüngdabapurtem yaritsü atema tenzükba mission organization ka lir.

Gospel Music Association-i ashiba agi, New Orleans nung Khristan kenten sentongtem agiba mapang nung Daigle-i New Orleans' Ellis Marsalis Center, Roots of Music, NOCCA, KidSmar aser Young Audiences of Louisiana nem sen dollar 100,000 tenla agütsü.

2022 küm The Fund Price ajanga lai charities balala nem sen dollar ajak agi 681,000 shi tenla agütsüogo, ta Christian Post osang ajanga metetdaksü.

Daigle-i, "Item organization balala nung inyaker nisung shiai temeim agi inyakba ngua ni pelar aser ajungmesor. Item organizations nung volunteers-i anibelem arema mapa tanen makai inyaker. Anogo shia parnoki nisung meyrjang aika taküm nung kongshia teimla agütsür, aser ibaji ajanga asenok ajak dang tatishitsü tajung sayur," ta metetdaksü.

2019 küm Daigle-i The Price Fund ya tenzuka liasü aser la indang kenten sentongtem atema ticket

alidang, merchandise alidang aser streaming options ajanga iba fund atema tenla agütsü akok. Iba fund tenzükba sülen alima tesem balala nung melungtet telok 37 nem sen dollar million 2.2 dak tema tenla agütsüogo.

2021 küm interview ka nung jembidang, Daigle-i la school azungba mapang nung lai Tsüngrem dang alima nung nüngdabapurtem aser timtemertem yaritsü atema nokdaktetsüsa la temang nung timtem anepjang ta sarasadema liasü, ta lemsatapa liasü.

"Nai Tsüngrem dang tasütait tanela meshira Pai agütsütsü. Pai na tasü itdaksütsü," ta lai ashi.

Uganda nung o toktepba sülen Muslim nungeri Khristan ka tepset

Nairobi (Kenya), January 12 (Agencies): Anüdoklen Uganda nung Khristan-Muslim tsüngda o toktepba sentong ka nung Muslim nunger 13-i Khrista agizükba sülen January 2, 2023 nü arrshi küm 37 tanur pezü tebu ka tepset.

Sironko District kübok Nakaloke nung o toktepba sentong shilem agiba sülen Ahamada Mafabi kidangi meyipa aoba mapang nung motorcycle ana nung Muslim nunger pezü Jihad yimyim "Allahu Akbar" ta ayimdena aruba sülen kotari agi pa tekong arang.

January 2, 2023 aonung 10:00 ako meta Mbale kübok Bukasakya Ward nung iba ya atalok, ta pa meina aosangi metetdaksü.

O toktepba sentong tembangba sülen Mafabi-i, "Muslim nungertemi yimjak nung Khrista agizükogo," ta jembia liasü.

Muslim nungertemi tejashi nung Mafabi dang sentong agiba tesemji toktsür oang aser Issa (Yisu) o Tsüngrem na kasa medemdangba aser Paji Tsüngrem chir ta jembibaji Tsüngrem mezüngmeshiba lir,

ta shia liasü. Muslim nunger tejashiji ngur pastor kati Khristan ana dang Mafabi ji Butaleja District nung aliba par ki dangi meina oang ta tuyua liasü.

"Onok Munkaga atongba mapang nung motorcycle ana nung Muslim nunger pezü aru aser onok adena aodang 'Allahu Akbar' ta ayimden aser onok mena aliba motorcycle nung merang oset kati zükoktsü; iba sülen parnoki Somali nunger kotari kati pa (Mafabi) tekong arang," ta pa meinsang Khristan kati metetdaksü.

Mafabi-i pa kinüngtsü den arrshi küm 3 nungeri 14 tsüngdapur tanur pezü toktsür süogo; parnok ajak tanga tesem kati ainshir lidaksütsü, ta pastor-i ashi.

Butaleja District nung Mafabi-i pastor aiben ajurua aruba sülen 2020 küm December ita nung Mafabi-i Islam yimsü toktsür Khrista agizüka liasü. Islam nunger ket nungi kümzüktsü atema tamasabo pastor-i par kidang pa jenoka lidaksü, iba sülen Arogoi tanga tesem ka nung pa nem ki ka agüja liasü.

Mafabi-i Islam yimsü aser Khristan yimsü naprongla kanga junga meteta aliba agi pai pastor yarisema 2021 küm tomle Khristan-Muslim tsüngda o toktepba sentongtem tenzükaliyasü aser küm ka tsüngda item sentongtem nung Muslim nunger 100 dak temai Khrista agizük.

Iba sülen nungjagi Muslim nungeri Mafabi pezüben tashi tepsettsü merangogo aser pastor-a aiben amokmerena aruogo.

Pastor-i Mafabi kinüngtsü aser par chirnurtem atema sarasademjang, ta mepishiba den külemi pai Islam yimsü toktsür Khrista agizükertem atema sütsüba center atema sarasademjang, ta mepishi. Iba center nungji Islam yimsü toktsür Khrista agizükertem nem tesayuba agütsüba den külemi training balala agütsür.

Pastor-i Mafabi tepsetba ken o benokba sülen police-i bushisügang tenzükogo.

"Ni tera tsübur, ajisüaka iba ya tanela tongbang ka lir aser Khristan reshikangshiba shilem ka lir, anungji ni kechi tia ajurudir ajuruaka renema dang lir," ta pastor-i ashi.

ANOGO ABEN TSÜNGREM DEN

Sarasadem Atalokba

T.Ken 61: 1-8

Kodangsa Dawid-i koda masü tia ajuru pai pa shisatsü ajunga sarasadem nung Tsüngrem dangi meyip. Tamanger asoshi sarasademji yimya tangu sashiba lir. Iba yagi nai ne sasa mokoktetba ajak koktetdaksür.

Mezüngbuba, sarasademi nai talangba tongtetdaksür (t.2). Dawidi ki menungra liasü. Pa Yirusalem nungi pilaa liaka pa Tsüngrem nungi mepilai liasü. Na kechi nung lidir liang, nai sarasadem ajanga kibong taküm, tembartem aser missionarytem tongtet.

Tanabuba, sarasademi na talangbai tudaksür (t.2). Dawid tejak maküma liasü. Kodang pai sarasadem, Tsüngremi pa ajungket aser pa asoshi yangluba tashi tait lungma, tashi tait mitsa nung toktsü (t.3). Sarasademi na tenem kolaki ajungketer aser tia tejangjaba ngudaksür.

Tasembuba, sarasademi na anasaba arudaksür (t.4). "Ne tashikangtemkübok" tetezü, an tetsüti-i techanu tashi kang kübok amokbangba masü; ibai Temeshitiba taktang nung Cherubim tashi kangtem kübok indang jembir. Yisu ajanga nai Tsüngrem alidaki aitsü akok aser Pa tashi kangtem kübok nung alitsü akok.

Pezübuba, sarasademi na takar küma indaksütsü akok (t.5). Sarasadem nung na Yisu Khrista nung senmang aliba dangi aor (Ef. 1:3).

Pungububa, sarasademi na sünga lidaksür (t.6,7). Taküm talangba alibaji masü, saka tarokba aliba azünger. Sarasademi ne taküm tarokba, takangba nung yutsür. Alima tepela nung masü saka Khrista nung takümüji sünga alitsü Khristan mapa lir.

Tatema, sarasademi na tepelaba kümdaksür (t.8). Sarasadem aser tenüngsang teti külemi aor. Dawidi ayimtena tenzük aser tenüngsanga atem. Pa sarasadem tenzük aser tepela nung atem. Sarasadem nung Kibuba den mapang agiang. Iba yagi ne taküm melenshidaksütsü.

Ne sarasadem meyipa reprangshiang. Iba yagi Dawid taküm nung kechi ataloktsü ne taküm nung ataloktsür asü? Aji oda mesüra sarasadem nung mapang tali endokang aser ne taküm nung kechi ataloker metettsü merangang.

Pastor Newman tsüksetsang dang pastor kinüngbui tai atok



Pastor, Trina Newman-Townsend.

January 12, 2022: Yaküm December 24 nü Los Angeles nung arrshi küm 62, pastor ka gari agi tsüksetba ken o nung California nung police-i aibelensangji puogo.

December 24, 2022 nü la Los Angeles nung aliba shelter home ka nung tanur kazütsütem tenla agütsütsü aoba mapang nung kari gari la tsükseta liasü.

Iba ken o nung Los Angeles Police Department-i arrshi küm 55, Carlos Mayor puogo.

Pastor, Trina Newman-Townsend'er chichiba tanur ana aser lai lar chir asütsü atema agiba tanur trok lir.

Taoba hopta police-i aibelensang apuba sülen lar kinüngertem aser medemertem LAPD South Traffic Division-i oa police dang pelaba

lemsatapa liasü.

Carlos Mayor bail nung chiokogo aser January 25 nü court nung pa anema maneni ken o angadangtsü.

Newman-Townsend kintüngbu, Curtis Townsend-i, "Carlos, ni nü dang tai atoker. Nai jena ao. Iba amaisa ataloker," ta ashi.

December 29, 2023 nü la indang memorial sentong nung Dwayne Newman-i mangyimertem dang, "Yangi alirtem aikati ozü aianu memeteti liaka la nem akhüm agütsür," ta lemsatapa liasü.

Newman-Townsend'er kinüngertemi la nem tetushi agütsütsü atema online ajanga tenla benden tenzükogo aser Mongolbar (January 10) tashi nung sen dollar 8,000 shi bendentetogo.

AO OSHI ANGAZÜKDAK:
TANÜ ANGAZÜKTSÜBA OJANG



Ongtok

(v) ku ajak südok (shave bald)

* Tsüinari kinunger asüdang ku ajak **ongtoker**.

Ongzük

(v) süngdong nungi süngjang agizükba (pluck fruit from trees)

* Tanurtemi süngdong nungi naring ajak **ongzük**.

OLONG PAITEP # 6398

1		2		3		4	5			
				6						7
		8								
9				10		11				
				12					13	
						14				
16									17	

TIPIEN

- 1. Nisung jenti - (5)
- 4. Tsük rudenba - (5)
- 6. Temzüng tesashi - (5)
- 8. S _ _ i - (3)
- 9. Nisung rongnung telemsa - (3)
- 10. Anogoshi - (4)
- 12. Ajanga aor - (4)
- 13. Tsük rizüngdak - (3)
- 14. Tebang nungi adokba - (3)
- 16. Süngdong talemangliba - (5)
- 17. Mepupet - (5)

LANGTSÜNGLEN

- 1. Tenük telong - (9)
- 2. Committee dang ajar - (5)
- 3. Yagi ki okdoker - (7)
- 5. Yim lenmang - (5)
- 7. Temoatsü keter meyipa aruba - (9)
- 11. Kanga junga menemba - (7)
- 12. Kenyongi majinü - (5)
- 13. Rong kanga tulu - (5)

OLONG PAITEP # 6397 TELANGZÜBA

TIPIEN :

- 1. Tanga, 6. Wara, 7. Rajang,
- 9. Anük, 10. Jenjang,
- 11. Alar, 14. Ngashi, 15. Nala,
- 16. Mechi.

LANGTSÜNGLEN :

- 2. Anga, 3. Yabang, 4. Tarok,
- 5. Orak, 8. Ainer, 9. Anema,
- 10. Jabili, 11. Among, 12. Miim,
- 13. Anem.

Agüja aliba noksa nung meputepi aliba bushiang



Tanur asoba anogo nung salem osang den noksa angati adokdaksünüra - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

CM Conrad-i Shillong nung 'shared school bus system' tenzüksü



CM Conrad-i Shillong nung 'shared school bus system' tenzüksüba noksa angur.

Shillong, January 12, 2023

(Agencies): Meghalaya Chief Minister Conrad K Sangma-i Bodbarnü school bus 30 tashi sayatsüogo.

U Soso Tham Auditorium, Shillong nung sentong ka nung CM Conrad-i shared school bus system, tourist vehicles aser agriculture response vehicles sayatsü.

Shillong nung lenmang temesü ajanga timtem ajuruba koktetsü atema Sustainable Transport and Efficient Mobility Society (STEMS) program tenzük, ta Chief Minister-i ashi.

"Tesiüba nung tebilemba aika lemsatepogo aser iba khuret koktetsü atema lenmangtem bushitepogo. Kasa mapang nung iba timtem tuluba akümer anungji STEMS program nung maparen aika densema lir" ta Conrad Sangma-i ashi.

"Shillong yimti nung

nüngdakbatem asoshi asalentong aika süogo aser mapa kanga meranga inyakogo. Iba sentong ya takok ngua inyaksü imlar" ta pai ashi.

Iba sentong ya Meghalaya kübok tanga tesemtem nunga inyaksü, ta Conrad-isa shisem.

Prime Agriculture Response Vehicles indang olen ka ashidang "asenoki küm shia iba sentong inyaksü aser aluyimer telok teimba awajemtsü merangtsü. Iba ajanga aluyimertem asoshi transportation network tajung ka angutsü" ta Conrad-i ashi.

"Prime Tourist Vehicles ya tourism sector ajungkettsü atema sentong ka lir. Iba ajanga tourist nem service tajung agütsüsü aser kasa mapang entrepreneurs-i maangka aika angutsü" ta Chief Minister-isa metetdaksü.

"Tanü sayaba bus garitem ya school balalai school trips atema

amshitsü aser kasa bus ya office-i aoertemia amshitsü aser tourist temji sodi anogotem mesüra hopta tatemlen amshitsü. Iba ajanga bus garitem senzüba nung tajangzük alitsü" ta STEMS CEO, Isawanda Laloo-i ashi.

STEMS nung Traffic, Police, Education, Transport, District Administration aser Urban Affairs nungi züngsemtem dena lir.

Bus shia nung Front View, Rear View, Driver View, Boarding View aser Seating View atema CCTV cameras enoka lir aser GPS keta lir.

NIC-i bus tracking aser booking atema app aser website yanglutsü aser Transport Department-i bus tem anepalutsü.

Item bus driver tem ya Meghalaya Skills Development Society ajanga training agütsüsü.

All Bodo Students' Union-i Ranjan Daimary chioktsü akhanger

Guwahati, January 12, 2023

(Agencies): New Delhi nung Mongulbarnü Bodoland Territorial Region (BTR)

Agreement meyipa repringshiba senden ka nung All Bodo Students' Union (ABSU) President Dipen Boro-i Ranjan Daimary chioktsü takhangba agütsü.

Iba senden nung Union Ministry of Home Affairs nung Additional Secretary Piyush Goya laden.

Senden nungsa Assam Chief Secretary Paban Kumar Borthakur den BTR CEO Pramod Boro na aden.

ABSU President Dipen Boro-i parnok telok tenüing nung Ranjan Daimary chioktsüba indang onük benok.

National Democratic Front of Bodoland (NDFB) tenzüksang Daimary chioktsüba takhangba den ano 2024 tashi

nung BTR agreement nung aliba clauses ajak mapa küma tenzüksü ABSU-i ashi.

Iba tenangzüktep ya taküm March 31 tashi nung tenzüksüla aser Daimary chioktsüba den külemi taküm piyong tepuokdak yua alir ajak chioktsü atema paisa takhangba agütsü.

Ranjan Daimary ya 2008 küm Assam kübok tesem balala nung bomb pokdaksütsü tasa atonga inyaksang lir.

January 2019 nung Ranjan Daimary aser nisung 13 2008 Assam bomb ken o dak sendakba nung aitsü. Central Bureau of Investigation (CBI) indang special court kati iba atema Daimary den nisung 9 taküm piyong tepuokdak ayutsü atema temerenshi agütsü.

2008 ASSAM BOMBINGS October 30, 2008 anüingdang Guwahati yimti aser Assam anüolen tsütsü tesem kar nung

bomb tarensena pokdaksü.

Guwahati, Barpeta Road, Bongaigaon aser Kokrajhar nung bomb 18 tashi apok aser idangji nisung 81 pokset aser 470 yiru.

Iba bomb lendong nung Guwahati nung nisung 41, Kokrajhar nung 21 aser Barpeta Road nung 15 pokseta liasü.

Iba sülen November 2, 2008 nü yirua alir nisung pezü tashi asü.

Iba anogo RDX mesüra C4 amala tanga plastic explosives aika amshia pokdaksü ta police ketdangsürtemi ashi.

Kasa anogo telungpurtemi Assam nung police garitem indang convoy ka amakdang police 7 aser convoy 3 asü.

National Democratic Front of Bodoland (NDFB) tanishir Rajan Daimary tetuyuba nung ajemdaker iba mapa ya inyaka liasü.

Assembly elections sülen Mizoram Congress-i sorkar akümtsü

Aizawl, January 12, 2023

(Agencies): Mizoram nung Congress party-i assembly elections sülen Mizoram sorkar akümtsü tamang akar.

2023 küm tatemlen Mizoram Assembly elections agütsü.

"Assembly elections agiba

sülen Mizoram nung onoki sorkar akümtsü" ta Mizoram Congress president Lalsawta-i ashi.

Onoki election nung takok angutsü atema sen tashi nung mamanger, ta Lalsawta-isa ashi.

Mizoram Congress-i state

nung aliba nübertem den tesentaktep aser party tangatetba nung rangloker mapa inyaksü ta paisa ashi.

"Onoki sorkar kümra Mizoram Congress-i electricity generation indang tongti süa inyaksü" ta Lalsawta-i shisem.

**GOVERNMENT OF NAGALAND
ADMINISTRATIVE TRAINING INSTITUTE
NAGALAND: KOHIMA**

No. ATI-E-APTT/150/17

Dated Kohima the January 2023.

ADVERTISEMENT

In pursuance to the Government Office Memorandum No.AR-3/GEN-174/2007 (pt) Dated 03.03.2022, applications are invited from the indigenous citizen of Nagaland to fill up the under mentioned post in Administrative Training Institute, Kohima.

Sl.No	Name of the Post	No. of Vacancy	Grade	Pay Matrix
1	Peon (MTS)	2 (Two). (1 post reserved for BT Konyak)	IV	Level-1
2	Cook	1 (One)	IV	Level-1

Eligibility Criteria

- The minimum age of candidate shall not be less than 18 years and not more than 38 years of age as on 22.04.2023.
- The reservation of post shall be as per the existing policy of the State Government as notified by the P&AR Department, Nagaland.
- Serving Government Employees are required to submit 'No Objection Certificate' with date of initial appointment duly signed by the Head of Department with name and official seal.
- For the post of Cook, preference will be given to those candidates with Professional Training Certificate/Work experience.
- Application addressed to the Director General ATI, Kohima along with two colour passport photo should be submitted to the Superintendent, ATI, Kohima on or before **20.01.2023 (Friday) up to 3:00 PM.**
- The mode of selection shall be through Viva-voce. Shortlisted candidates shall be interviewed through phone for Vice-voce.
- The candidate should provide WhatsApp Contact No/Email ID and should be readily available on call.
- The candidates called for Viva-voce shall produce the following documents in original:
 - Indigenous Inhabitant Certificate.
 - Schedule Tribe Certificate.
 - Educational Qualifications.

Sd/-
R. BINCHILLO THONG, IAS
Director General

**GOVERNMENT OF NAGALAND
DIRECTORATE OF EMPLOYMENT, SKILL
DEVELOPMENT & ENTREPRENEURSHIP,
NAGALAND, KOHIMA**

NO.DESE-1/135/19/352

Dated, Kohima, the 12th Jan, 2023

CIRCULAR

In continuation to this office advertisement of even number dated 21/12/2022, this is for information to all the selected candidates for recruitment to Multi Tasking Staff (MTS) Posts under the Department of Employment, Skill Development & Entrepreneurship, Nagaland, shall be held on the following days.

- Date of Viva Voce for Kohima District shall be on 16/01/2023 (Monday) from 10:00 A.M onwards.
- Date of Viva Voce for Dimapur&Tuensang District shall be on 17/01/2023 (Tuesday) from 10:00 A.M onwards.

Venue: Directorate of Employment, Skill Development & Entrepreneurship, Nagaland

Note :

- Selected Candidates will be intimated through SMS.
- For the candidates from Tuensang and Dimapur Districts option will be given for interview through phone. However, for those who would like to physically appear may do so on the above mentioned date.

Sd/-
KOVI MEYASE(NCS)
Additional Secretary,
& Ex-Officio Director (HoD)

Australia aser Papua New Guinea na security pact ka yangludat

Canberra, Aenjeti/January

12 (Agencies): Australia aser kidanger Papua New Guinea nungi lenirtemi, security treaty tasen ka tembanga yangluya aliba indang metetdaksüogo. Iba inyakyim ya Pacific region nung China kanga kara renloka oya aliba azioktsü atema agiba ama reprangteter.

Australia Ato Kilonser Anthony Albanese-i Brehostibarnü ashiba agi, pai iba treaty atema sensaksem ya April ita tashi nungbo tembangtsü aser June ita sign süteptsü imlar. Ajsüaka treaty indang osang tejangja tang tashi agüja mali.

Tang benoka aliba Bilateral Security Treaty ajanga defence ayimjemsü, kong troop training aser joint operation tem atema tang sensak tesem dak lir aser iba den bendenloksema tzümpung melenshiba aser cybersecurity onüka densema lir.

Albanese-i, Australia aser Papua New Guinea na rongsenketzung aser security dak sendakba nung tejangraba ya bendangtsü makoktsü, ta ashi. 1975 küm nüjiso anguba sülen Papua New Guinea parliament nung bendanger lenirtem rongnungi mezüngbuba o jembiba sülen ghonda ishika lir Albanese-i iba osang sangdonga liasü.

"Asenok rongsenketzung aser security nung tesendaktep ya linük anaprongla tejangraba dak ajemdaker lir," ta Albanese-i osangbenertem den sensaksemba mapang ashi.

"Asenok tejangrabatem bendangtsü makoktsü. Australia kümzüka melira Papua New Guinea kümzüka melitetsü aser kasaji Papua New Guinea kümzüka melira Australia kümzüka melitetsü,"

ta pai ashi.

Australia indang defence minister Richard Marles-i October ita ashiba agi, Canberra-i linük anaprongla nungi navy, air force aser army personnel tem tali sendaktepa inyaksü asoshi tenangzüktepba ka yangluner.

"Iba sensaksem akatsü ya onok tejangraba lir, ajita asünungdang linük anaprongla tarutsü tekümzüka kübok alitsü," ta Papua New Guinea Ato Kilonser James Marape-i ashi.

Marape-isa, linük ana tekümzüka ya nitepa lir ta ashi. "Papua New Guinea-i benokba onük tejangdangi bener moi Indo-Pacific indang sensak mesemtettsü, kechiyong onok teyongtsü nung lir," ta pai ashi.

"Indo-Pacific region nung PNG shilem agitsü atema Papua New Guinea rongsenketzung nung tashi aittsüla," ta Ato Kilonser-i ashi.

United States aser Australia densema parnok den sendaktepa aliba linüktem Pacific region nung Beijing kanga kara renloka aoba dak sendakba nung telangzüba agütsütsü asoshi inyaktepdar. Taoba küm April ita China aser Solomon Islands na tsüngda security tenangzüktepba ka yangluba ajanga South Pacific region nung China-i military amenoktsü meranger asütsü ta tsübu bilemdaktsü.

Albanese-isa, pai linük ana tsüngda shishilembaba tali tajungba küma yanglushiner ta ashi. Coffee aser cocoa nungi fisheries aser tourism ta lenla ajak nung tesendaktep tajungba küma yanglushier aser port, lenmang aser digital infrastructure amala nation-building project tem asoshi PNG den longjemer inyaker, ta pai ashi.

PNG nem teyari agütsüba linüktem rongnung Australia tongtiba lir, shirnok kübok PNG liasü.

Pacific nung China renloka aoba mapang Australia-i PNG den tesendaktep akangshitsü atema aritepa inyakdar aser taoba küm May ita Albanese-i election akokba sülen linük ana nungi lenirtem aiben ajurutepa arudar.

Lenir anapronglai linük ana yongtsü nung mapa inyakerter sadem sadema senzudaktsütsü asoshi visa anepalutsütsü mulungtepogo aser Albanese-i working holiday visa scheme ka June ita nungi benoka inyaksangshitsü ta metetdaksüogo.

Ukraine rara: Surovikin melena Gerasimov shimogo

Moscow, Aenjeti/January

12 (Agencies): Tir Vladimir Putin-i Ukraine nung Russia nung commander tem rongnung tongtiba aginogo.

Chief of the General Staff Valery Gerasimov lenisüba nung Ukraine nung rara raratsü.

Gen Gerasimov-i Sergei Surovikin melenogo. Sergei lenisüba nung Russia-i Ukraine nung energy infrastructure tem kanga mejungi maka liasü.

Ukraine anütoklen parnok tejangdangi odar ta Russia-i ashiba mapang ka nung tang iba temelenshi adokogo.

Russia-i taoba küm February 24 nü nungi tenzüka Ukraine maka arudar.

Gen Gerasimov, shibai 2012

küm nungi iba mapa bena lir, pa ya Soviet era sülen Russia nung chief of general staff tem rongnung iba mapa talangtiba abensang lir.

Gen Surovikin dang ya "General Armageddon" ta ajar, shibai Russia nung Syria nung rara mapang aser talisa Aleppo yimti poksatsüba mapang taochi makai tasa amshia liasü.

October ita Ukraine nung rara len anitsü atema shimba sülen pai Ukraine indang energy infrastructure raksatsütsü tenzüker aser iba ajanga Ukraine nungertem aika power aser tzü agi kanga anünga aküm. Pa lenisüba nungsa Russia nungertem

Kherson nungi atsüngina ao, koba Ukraine asoshi takok tulu ka liasü.

Russia defence ministry-i ashiba agi, Gen Surovikin melenba ya armed force kübok telen balala tali tajungba sendakteptsü aser Russia nung sepaitem tali tajungba azioka achayangtsü atema lir. Ajsüaka iba jenjang agiba ya, pai tashi kanga amshiba ajanga ta bilemer.

"Ukraine nung unified commander ka ama Surovikin kanga tashi tait kümogo aser pai Putin den jembiba mapang [Russian Defence Minister Sergei] Shoigu aser Gerasimov na paitoka liasü," ta military analyst Rob Lee-i

Twitter nung zülutsü.

Soledar nung maneni rara aliba mapang Bodhbarnü iba osang sangdongogo. Soledar atsüngba ajanga Bakmut yimti amaktsü atema Russia nung sepaitem nem teyari agütsütsü.

Soledar nung salt mine aika lir anungji item mine tem ya sepaitem anenzüktsü aser hadir bendena ayutsü atema amshitetsü.

Bodhbar aonung Russia indang mercenary Wagner Group lenir Yevgeny Prigozhin-i, par sepaitem Soledar agiogo ta ashi ajsüaka Ukraine tir Volodymyr Zelensky-i iba yimti ano matsüng aser maneni raradar ta ashi.



Chuchuyimlang Yimtak Langpangkong Kaketshir Mungdang Küm 75 Bensa Washimung sentong den külemi 33Buba Saisapong sentong akaba nung tasemnübuba anogo Merangkong aser Changtongya na teburtem Volleyball asayadang tangokba aser iba asaya Changtongya-i koka liasü

Australia-i Afghanistan den masayatsü telemtetba agi

Aenjeti/January 12, 2023

(Agencies): Taliban, Cricket Australia (CA)-i tetsürtem nem tenokdangba tali agütsüba sülen March ita Afghanistan den asayatsü aliba One-Day International (ODI) asayamung nung Australia tebur team-i shilem magitsü telemtetba agiogo.

Australia aser Afghanistan na United Arab Emirates nung ODI asem asayatsü renemer liasü, saka Australia sorkar aser stakeholder tem den sensak asemba sülen CA-i iba asayamung nung shilem magitsü telemtetba agiogo.

"Taliban-i tawa tetsürtem kaketshitsü bushiba, employment aser park aser gym temi maotsü atema tenokdangba agütsüba sülen iba telemtetba agia liasü," ta CA-i sangdong ka ajanga Brehostibarnü metetdaksü.

"Afghanistan densema alima ajunga nung tetsür aser tebur

asayar renlokyonga aoba nung tetaryi agütsütsü CA bendanga agütsür lir aser Afghanistan nung tetsürtem jenjang tajungba kuma yanglushitsütsü imla Afghanistan Cricket Board den maneni inyaksangshitsü.

"Iba ken o pusemba atema Australia sorkar dang kanga pelar," ta CA sangdong ajangsa metetdaksü.

Iba asayamung ya International Cricket Council's (ICC) Super League nung shilem ka lir, kong temaba jenjang nung tembangba team ti 2023 World Cup atema indang indanga qualify asütsü. Iba asayamung atema Australia qualify süatokogo.

2021 küm November ita Australia aser Afghanistan na Test ka asayatsü liasü saka iba küm August ita Taliban-i sorkar atsüngba ajanga thinentsüsa aküm.

ICC full-member nation tem rongnung tetsür team maliba

linük Afghanistan kija lir. Taliban-i sorkar atsüngba sülen parnok maneni ICC aayamungtem nung shilem agidar, aser taoba küm Twenty20 World Cup nung Australia dena asayaogo.

ICC Chief Executive Geoff Allardice-i ashiba agi, tetsürtem cricket asaya ajungkettsü atema Afghanistan tejangraba maliba ya ICC atema tebilemstsüka aser iba ken o ya taruba board senden nung sensak asemtsü.

Iba asayamung nung shilem magiba sülen Australia competition points 30 akoksatsü, koba World Cup qualification atema tongtibang lir. Ajisüaka parnok India nung October ita asayatsü aliba 50 over asayamung atema qualify süatokogo.

Taliban-i 2021 küm sorkar atsüngba sülen tetsürtem saisapong balala nung shilem agitsü atema tenokdangba agütsüogo.

Malaysia Open: HS Prannoy quarterfinals-i iogo

Aenjeti/January 12, 2023

(Agencies): India nunger badminton asayar HS Prannoy-i maneni kanga junga asaya Brehostibarnü Malaysia Open Super 750 tournament tebur kija asaya nung Indonesia nunger asayar Chico Aura Dwi Wardoyo koka quarterfinals-i iogo.

World number 8 India nunger asayar yagi world number 19 Chico 21-9 15-21 21-16 agi ghonda ka ser minute 40 nung akok. Kerala nungi arishi küm 30 tain asayar ya quarter nung Malaysia nunger asayar Ng Tze Yong mesüra Japan nunger asayar Kodai Naraoka den asayatsü.

Kasa mapang nung India tsürtem rongnungi tarep asayar Treasa Jolly aser Gayatri Gopichand na tetsür tarep asaya pre-quarterfinals

nung Bulgaria tsür Gabriela Stoeva aser Stefani Stoeva nati 13-21 21-15 17-21 agi tsükdaksüogo.

Prannoy aser Chico na tang agi tanabenbuba asayaogo aser 2018 küm Syed Modi International nung mezüng asayaba mapang Chico-i pa koka liasü.

Prannoy tang kanga junga asayaba mapang ka lir aser Brehostibarnüa pai kanga junga asaya tenzük aser mezüngbuba game nung break tashi nung pa 11-5 agi tejkadang liasü. Chico-i kanga meranga asayadang saka junga masayateti Prannoy nem mezüngbuba game kokdaksü.

Tanabuba game nung Chico-i asaya tajungba azüokteta asaya aser 6-2 agi pa tejkadang aküm. Indonesia nunger asayar yagi timba attack süa asaya aser interval

tashi nung pa 11-5 agi tejkadang liasü.

Asayar anaprongli rally talanglang asayatsü tebilemba nung asaya saka Prannoy-i finishing nung aibelenba ajanga Chico 17-11 agi tejkadang aküm aser iba sülen asaya koka liasü.

Decider asayaba mapang Prannoy-i asendenshir asaya aser line nung kanga junga asaya pa 5-2 agi tejkadang aküm. Pai Chico ya court ajunga nung asemzüdakja asaya aser break tashi nung pa point pongu agi tejkadang liasü.

Prannoy-i shot tajung aika asaya aser point aika bendena liasü. Chico-ia shot tajung aika asaya saka rally mapang aibelenba ajanga pa akoksa aser Prannoy 17-12 agi tejkadang aküm aser pai asaya koka liasü.

8buba FROLIC CUP January 30 nü tenzüktsü

Dimapur, Aenjeti/January 12 (TYO): Frolic Club-i ayongzüka asayaba 8buba Forlic Cup January 30 nungi tenzükta Local Ground, Medziphema nung asayatsü.

Taküm iba asayamung nung takoker nem sempet sen lakh 1, runners up nem meyrejang temen aser iba den jurila senpet den kuli kaket agütsütsü.

Club-isa, January 28 nü

Local Ground, Medziphema nung amungtsü aliba Frolic Club Silver Jubilee nung shilem agitsü atema nübürtem jaokogo

Kasa mapang nung iba asayamung nung shilem agitsü jangraba team tem dang Club Sport Secy den item number:

8837486063 / 9383382890 ajanga tongteprateptsü metetdaksüogo.

Olympic Qualifiers nung India tetsür team Kyrgyz Republic, Turkmenistan den ata lir

New Delhi, Aenjeti/January 12 (TYO): Women's Olympic Football Tournament 2024 Asian Qualifiers Round 1 atema India tetsür team Group G nung Kyrgyz Republic aser Turkmenistan na den ata lir. Team tem ya Brehostibarnü AFC House, Kuala Lumpur nung lemsa liasü.

Iba asayamung atema team metsür trok rongnungi telok pongu nung team pezüzü aser telok asem nung asemsem kuma lemsaogo. Team tem ya one-round league format nung tesem ka nung dang April 3 nungi 11 tashi asayatsü.

Telok tenetprongla nungi takokertem tanabuba Round-i aitsü, kong parnok temaba jenjang nung aliba team pongu; DPR Korea (North Korea), Japan, Australia, China aser Korea Republic den asayatsü.

Tanabuba round nungi

team pezü (group nung temaba jenjang nung tembangba team asem aser best-ranked runners-up) tasembuba round asayatsü, kong parnok home aser away nung asayatsü aser takoker 2024 Paris Olympics atema qualify asütsü.

Group asaya ayongzüka asayatsüba linük ya Asian Football Confederation (AFC)-i mapang tatsüka tsüngda sangdongtsü.

Round 1 draw:

Group A: Uzbekistan, Jordan, Timor-Leste, Bhutan

Group B: Myanmar, Iran, Bangladesh, Maldives

Group C: Vietnam, Nepal, Palestine, Afghanistan

Group D: Thailand, Mongolia, Singapore, Sri Lanka

Group E: Philippines, Hong Kong, Tajikistan, Pakistan

Group F: Chinese Taipei, Indonesia, Lebanon

Group G: India, Kyrgyz Republic, Turkmenistan.

Adelaide International: Daria Kasatkina semi-final-i iogo

Aenjeti/January 12, 2023

(Agencies): World number eight asayar Daria Kasatkina-i Adelaide International 2 asayamung nung Brehostibarnü 6-3 7-6(3) agi Petra Kvitova madak takok ngua semi-final-i iogo.

Wimbledon anaben tashi koker alila Kvitova nung Brehostibarnü asaya junga masayatet aser lai unforced errors 42 tashi mena liasü, ajisüaka tanabuba set nung lai match points ana tashi kümzükteta asayaogo.

"Asaya akoktsü point ka dang nüngdaka liasü saka tera agi dang tamakok mangu," ta Kasatkina-i ashi.

"Petra den asayaba

mapang score kecha nüngdak mali aser teti renema alitsü nüngdaker. Tiebreaker asayaba mapang asaya nung rangloker asayatetba atema pelar," ta laisa ashi.

Iba asaya akokba sülen Kasatkina semifinal nung Spain tsür Paula Badosa den asayatsü shibai Braziltür Haddad Maia 7-6(5) 7-5 agi koka liasü.

Kasatkina ya küm pezü tejkadang top 10 asayar ka liasü saka lai junga masayateti aküm aser asaya tera agi dang metoktsü liasü. Ajisüaka 2022 küm junga asayaba sülen taküma kanga junga asaya tenzükogo.

BILEM DANGANG

"Mulungsentsü indang indanga lir teti tepela nung alir."